

欽  
定  
全  
唐  
文

欽定全唐文卷六百九十三目錄

薛存誠

禎石賦

僊石靈臺賦

孔戣

謝致仕表

謝賜手詔兼神刀藥金狀

謝借馬狀

賀冊尊號狀

爲崔大夫賀冊皇太子狀

奏加嶺南州縣官課料錢狀

又謝賜藥金狀

元錫

蘇州刺史謝上表

福州刺史謝上表

衢州刺史謝上表

宣州刺史謝上表

薛平

奏騶虞見狀

李涉

南溪元巖銘

并序

王涇

中宗廟主當遷議

大唐郊祀錄序

李虞仲

授學士王源中戶部侍郎制

授學士李讓夷職方員外郎充職制

授學士王源中等中書舍人制

授學士路隋等中書舍人制

授柏耆兵部郎中等制

授王政雅等兵部郎中制

授蕭睦祠部員外郎制

授李行修刑部員外郎制

授張勝之比部員外郎制

加劉栖楚御史大夫制

授崔羣右僕射兼太常卿制

授楊歸厚太子右庶子制

授高重同州刺史兼防禦使制

授裴洌郭贍等諸州刺史制

授王承休等諸州刺史制

授李渤給事中鄭涵中書舍人等制

賈餗等中書舍人制

重定房式諡議

杜周士

樂德教胄子賦

代孔大夫乞朝覲表

代崔中丞請朝覲表

欽定全唐文卷六百九十三

薛存誠

存誠字資明河東人第進士元和中累拜給事中遷御史中丞卒贈刑部侍郎

禎石賦

以素質元字篆隸相參爲韻

上帝乃眷下顧豐我皇祚產禎石以報德約遠人以遐赴外輝煥以發章內清明而含素方圓冰潔篆隸星布五千符聖歷之長一九合太陽之數瑩然非追琢所及忽爾若神靈來附考乎文也知諸受命之期徵乎石焉示此維城



之固且夫文旌乎寶石堅乎質垂本根以繁茂作元后之  
貞吉驗符而天命有歸貽慶而孫謀莫失方洛書以自來  
狀河圖以負出懿夫黼彩發鮮隱起成妍貿非工斲字乃  
神鐫移篆文於玉璽之上取隸則於銅棺之前紛鳥跡以  
屈漢若飛騰而在泉帝拜昌言慶實延於卜代名傳聖運  
功何異於補天苟不思而來暨恭承眷於上元信乎瑞以  
勤致彰乎天賜其爲后也貴乎無得而稱其爲石也下乃  
不求而致豈比夫渭濱之璜兮空言佐命峴首之碑兮永  
沉文字孰若我垂吉祚於當時演昌期於後嗣且夫文可

嘉而不可卷石可固而不可轉題八角而爾乃增輝刻九  
言而吾斯盡善宜子孫之螭螭得先徵於隸篆太宗勞謙  
垂制度告上帝伊連被而莫紀自高祖而流裔其石也爲  
遐玉之祥惟孤也實先君之系誠降慶之所致敢欺紿於  
輿隸於是公卿列辟劔佩鏘鏘聯趨詣石載拜稱觴斯萬  
人之有慶表二聖之重光不然何炫發於石玉侔其相瑩  
煌無點璀璨有章帝曰祖考之德惟覃股肱之能以參故  
天錫之罔替諒不穀而何堪

僊石靈臺賦

惟神化之所感何禎祥之必臻位將天而同德天與日而  
共新百靈扶於三善萬象資乎一人是以英聲遠被嘉貺  
必陳於是祕其迹則如畫如隱圖其文則匪雕匪刻屈若  
絲縈舒同髮直彩非因染辭無假飾雖真籙之可觀固神  
功之靡測若乃烟消字發苔落文生映月波起含日金明  
彰八千之綿祚著三代之珍名或鸞迴而鳳轉乍雲點而  
霜橫法兼篆籀體備形聲信天筆之攸假實神翰之所成  
至如桂影宵臨星光夜燭分若珠解連同瓊續映朝霞以  
散錦流夕露以垂玉紀三皇之故事包五代之遺躅足使

濁河龍泳清洛龜沈既超前而冠後亦挾古而光今所以  
管絃流韻鐘石凝音豈獨妙符至理固亦道叶乾心總羣  
瑞以考徵實表盛乎貞紀騰茂實於千載激清流乎萬祀  
元象煥以呈祥靈山鬱以効祉明皇期一作基之永固與天  
地乎終始嗟微臣之菲薄屬欽明於暮齒望天闕以長謠  
情願戀其何已也

孔戣

戣字君嚴冀州人登進士第元和初授嶺南節度使穆宗  
立召爲吏部侍郎改右散騎常侍轉尚書左丞以禮部尚

書致仕長慶四年卒年七十三贈兵部尚書諡曰貞

謝致仕表

臣某言臣聞七十致政禮經格言此蓋先王立教示人有終也苟或冒榮貪祿不知其退亦搢紳之醜也今臣年已過矣耄亦及之顧盼班行每懷慙覲幸屬聖明御宇多士盈朝百度旣貞萬靈遂性躍魚戲在藻之樂野夫盡擊壤之歡微臣叨逢此時得以陳露而猶進不知止懼損明風况齒髮已衰筋力不逮雖列官次恐貽敗闕伏以南宮左轄華省紀綱政理所關選用爲重豈臣衰朽久膺此任伏

乞聖鑒察臣誠懇賜臣骸骨歸老邱園所冀聖朝無浮食  
之人微臣勉強飯之責將違聖代戀闕誠深無任惓歎之  
至

謝賜手詔兼神刀藥金狀

右中使某至伏奉墨詔并賜藥金一合神刀等俯循陋質  
仰戴殊私渤澥無比其深山嶽無方其重臣華門賤品環  
堵諸生乏禦侮之籌謀罕濟時之方畧而因緣官學塵忝  
班行效無可稱事每逾量聖慈過聽擢領藩方祇命戒途  
不敢陳讓省躬撫事益懼菲才今又特降王人遠臨郊甸

寶刀出於武庫上藥本於金精足以蠲除疫癘激發忠勇  
顧惟孱懦承此寶光捐軀盡節豈足爲報無任感戀懇款  
之至

謝借馬狀

右中使至奉宣進止將前件馬送臣至京兆路界祇承寵  
光載兢載惕微臣猥以庸瑣謬分憂寄拜命之日已受賜  
於龍媒遵路之時復假榮於天驥恩私稠疊渥澤殊常豈  
謂聖意不遺獨懷軫念輟驂騶於內廐騁逸步於長衢驅  
馳忘勞服習如志誓當夙駕奔走所部冀安夷獠以免聖

憂無任感恩懇款之至

賀冊尊號狀

右臣聞唐德格天列聖垂祐必紀名號以彰治功伏惟元和聖文神武法天應道皇帝陛下纘戎十聖時乘六龍躬一德而善繼丕承罄有形而天覆地載旣休武力方用文經遺步驟於殷周振聲容於華夏旣而天人合應億兆叶心探至道於邦家之先揭鴻猷於疆名之域陛下初違羣議方守謙光旋體至公遽迴慈睠德意旣降盛禮將陳凡在品彙無任幸甚臣以待罪遐徼不獲稱慶闕庭徒勤子在



牟江海之心有同太史滯留之日無任歡抃之至

爲崔大夫賀冊皇太子狀

臣聞帝皇立極必建儲貳俾承宗祧所以祇奉棗盛永固社稷者也伏惟睿聖文武皇帝陛下積德承業光有天下思正國本以和人心載考春秋之義以明君臣之道主茲七鬯允屬元良推明至公振舉舊典皇太子體仁秉哲旣嫡且賢溫文發中孝友聞外欽若不訓允膺冊禮陛下將嗣十聖之休烈垂百代之懿範大備禮物廣設明庭陰氣方晦而忽銷旭日旣昇而增朗夷夏胥悅神祇克諧足以

包夏孕商跨周軼漢夫何晉魏以降易置瑣瑣不足侔比  
盛禮旣畢洪恩又洽恤刑議獄旌善賞勞禮問高年存恤  
疾隱皇王之德於茲備矣臣忝列近侍親承睿謨抃蹈之  
切不任愚懇

奏加嶺南州縣官課料錢狀

右伏以前件州縣或星布海壖或雲絕荒外首領強黠人  
戶傷殘撫御緝綏尤藉材幹刺史縣令皆非正員使司相  
承一例差攝貞廉者懇不願去貪求者苟務徇私臣自到  
州深知其弊必若責之以理莫若加給料錢今具分析如

前并不破上供錢物輒陳管見務在遠圖伏乞天恩允臣所請

又謝賜藥金狀

右內給事袁思藝至奉宣聖旨賜臣江東成金二挺若服之後深有補益兼延駐者伏以仙方所秘靈藥稱珍必候休明之辰上益無疆之壽不意俯迴天眷念及微臣賜九轉之金駐百年之命且螻蟻賤質豈能長固蒲柳易朽常慮先彫竊荷生成之恩寧酬造化之德澤如河海空欣羽翼之期寵若邱山何伸灰粉之謝

元錫

錫字君貺元和九年蘇州從事歷淄王傅終衢州刺史

蘇州刺史謝上表

臣某言伏奉十一月七日恩勅授臣持節蘇州諸軍事守  
蘇州刺史以今月六日到州上訖臣績用無聞寵章非次  
恩崇效淺任過憂深承命震惶不知所措臣某中謝伏惟  
睿聖文武皇帝陛下道符乾元功配坤德盛明參於兩曜  
休烈冠於百王覆幬羣生憂勤庶政至於牧人長吏簡在  
宸衷然後明視達聰獎勞懲過俗臻壽域垓靡窮人是以

列郡庶尹莫不甘於隕首以荅元造臣藝術非工吏能罕  
立累因過幸嘗忝官榮所厯衢婺兩州皆屢荒殘之後侵  
漁稍息是朝廷法令之明饑饉不生屬年歲豐稔之運績  
無異等恩被殊私累貪天功以竊身寵况東吳繁劇首冠  
江淮自非良能豈可妄處受任踰重兢慙失圖獨不汰侈  
於法程晏安於寢食誓刻肌骨用申涓毫無任受恩慙懼  
之至

福州刺史謝上表

臣某言臣才不過人任忽踰量跼蹐無措憂慙不容臣某

誠惶誠懼頓首頓首臣歷忝方州誠無異效至如俗幸不  
擾人懷小安是屬天時實非臣力況自永貞以來陛下每  
降卹隱之澤則憚發保安發賑救之仁則癘災不起法令  
昭著姦邪已清時歲豐穰流庸自占比屋日用豈臣之功  
陛下勸獎道崇葺綏念切採擢凡品統臨列城將何以表  
正一方肅清羣吏庶竭微力仰酬天慈力不足則繼之以  
死是臣職分所當奉行秉茲一心敢有貳事以今月二十  
八日到所部上訖謹奉表陳謝以聞

衢州刺史謝上表

臣某言伏奉九月二十一日恩旨授臣衢州刺史以今月十八日到州上訖祇承寵光魂首飛越臣已嘗試任績用無聞薦沐恩私兢惶靡措臣本諸生行能罕立徒以親知謬舉踐履踰涯常叨省署之榮亟歷萬方之重事懷覲冒恩戴生成伏以浙東諸州衢爲大郡累經荒儉切在保綏憂勤所分簡求非易臣自量智力懼不勝任守信偷安踰年受代當此益重實昧寵章頃屬旱災相繼天喪過半生聚長育理難卒平賦斂徵求物有常數自前年以來陛下以覆育之慈深布帛綢賑貽口食蠲復地征人用昭蘇氣

消疵癘竊以匹夫遂性天下懷仁况江表獲安動踰百萬  
臣職當撫字倍切常情欲宣明詔條通達幽隱敦實務本  
者勸之以農開通明敏者進之以學奉朝廷法制守使府  
規模克勵小心庶無大悔有渝此志敢追明刑

宣州刺史謝上表

臣某言中使王文朝至伏奉六月六日恩制授臣宣州刺  
史兼御史中丞充宣歙池等州都團練觀察處置等使以  
七月二十九日到鎮上訖臣謬承寵章顧影慙灼祇奉明  
詔撫心震驚臣某中謝伏惟元和聖文神武法天應道皇



帝陛下嗣承大寶光啟中興德洽生靈道超今古平逆亂  
之本建太平之階將澄化源先正理道詳授長吏撫綏疲  
人冀厚生成用頒教化以臣庸昧何以表率一方以臣孱  
微何以訓齊百姓始懼貪冒終思悔尤伏以人之性命懸  
在衣食衣食所繫蠶農爲先使蠶不失時農無愆候其在  
姦豪屏息賦役均平旣絕侵漁雖災害不困旣均物力雖  
貧乏亦安不困而安可成富庶臣累叨重任願効微功嘗  
所粗知猶勉懼不至況有未達豈昏愚可任竊自思惟不  
遑寢食至若鉛刀一割之用駕馬再馳之勤所願酬恩更

期効命旬歲無補刑章敢逃無任受恩惶恐之至

薛平

平字坦塗贈太保平陽郡王嵩子累官左龍武大將軍授  
鄭滑節度使入爲左金吾衛大將軍帥鄭滑徙盧平封魏  
國公拜河中絳隰節度使更封韓召拜太子太保以司徒  
致仕卒年八十贈太傅

奏騶虞見狀

當管虞鄉縣王賢鄉有白虎入靈峯觀謹按孫氏瑞應圖  
白虎者義獸也名騶虞王者德至鳥獸澤洞幽冥則見謹

畫圖進上

李涉

涉洛陽人初與弟渤偕隱廬山自號清溪子憲宗朝爲太子通事舍人謫峽州司倉參軍太和中爲太學博士復以事流康州

南溪元巖銘

并序

桂爲郡也巖其先之有井室人民百千祀矣居是邦者匪哲則豪何四三里之內而巖不載於前籍爲巖將屈於古而合伸於今哉爲人未知其巖巖俟人以時哉青溪子昧

而未詳也予之仲曰渤受天雅性生不雜玩少嘗讀高士傳列仙經遊衡霍幽遐之境巢嵩廬水石之奧凡俗所覲必皆礱磨大璞翦鑿遺病意適而制非主於名寶歷初自給事中出藩於桂一之年治鄉野之病二之載搜郭郭之遺得隱山元巖冥契素尚余因謫去炎海途由桂林巖之勝再遂其賞勒銘洞石表遠跡於他年銘曰

桂之有山潛靈億年拔地騰霄戟列刀攢巖之有洞窈窕鬱盤虎挂龍懸形狀萬端旁馳杳冥仰踏巔岼玉落磬墜幽深晝寒巴陵地道小有洞天文籍之囿吾何有焉酒一

金定公集卷之三  
卮分琴一曲元巖之下可以窮年

王涇

涇官河南府密縣尉元和元年入爲太常博士

中宗廟主當遷議

禮經祖有功宗有德皆不毀之名也惟三代行之漢魏已降雖曰祖宗親盡則遷無功亦毀不得行古之道也昔夏后氏十五代祖顓頊而宗禹殷人七代祖契而宗湯周人三十六王以后穆爲太祖祖文王而宗武王聖唐德厚流廣遠法殷周奉景皇帝爲太祖祖高祖而宗太宗皆在百

代不遷之典故代宗升祔遷代祖也德宗升祔遷高宗也  
今順宗升祔中宗在三昭三穆之外謂之親盡遷於太廟  
夾室禮則然矣或諫者以則天太后革命中宗復而興之  
不在遷藏之例臣竊未喻也昔者高宗晏駕中宗奉遺詔  
自儲副而陟元后則天太后臨朝廢爲廬陵王聖歷元年  
太后詔復立爲皇太子屬太后聖壽延長御下日久奸臣  
擅命紊其紀度敬暉桓彥範等五臣俱唐舊臣匡輔王室  
翊中宗而承大統此乃子繼父業是中宗得之而且失之  
母授子位是中宗失之而復得之二十年間再爲皇太子

復踐皇帝位失之在已得之在已可謂革命中興之義殊也又以周漢之例推之幽王爲犬戎所滅平王東遷周不以平王爲中興不遷之廟其例一也漢呂后專權產祿秉政文帝自代邸而立之漢不以文帝爲中興不遷之廟其例二也霍光輔遷之廟其例三也伏以中宗孝和皇帝於聖上爲六代伯祖尊非正統廟亦親盡爰及周漢故事是與中興功德之主不同奉遷夾室固無疑也

### 大唐郊祀錄序

朝散郎前行河南府密縣尉太常禮院修撰臣涇言臣聞

在昔聖王之御宇也仰則觀天以知變俯則考地以取象  
因順變之道作爲禮樂化成人文以光天下者莫大乎郊  
祀著之方策豈微臣詎一二所能盡臣聞禮有志誠非玉  
帛無以見乎外樂有志節非鐘磬無以達乎中故自五帝  
殊時三王異禮莫不因之沿革觀損益焉伏惟皇帝陛下  
承天景命列聖重光法唐堯無爲而化致大禹黻冕之美  
明德超於千古至誠通於百靈玉帛牲縣大備前典微臣  
謬參綿範久厯歲時每仰絲綸輒書故實謹集厯代郊廟  
享祀之要及聖朝因革沿襲之由倫比其文各標篇目裁



爲大唐郊祀錄十卷其中義有同異皆隨文注釋神位升降并寫而爲圖祝史陳告之詞工歌大雅之什亦俱編於次謹詣光順門隨表封進伏望頒諸東觀庶有補於將來上表陛下教敬之原下伸微臣蟻術之望無任屏營懇款之至

李虞仲

虞仲字見之趙郡人元和初進士又擢宏詞累拜中書舍人大和中累遷兵部侍郎改吏部開成四年卒年六十五贈吏部尚書

授學士王源中戶部侍郎制

勅竭誠於補察必罄訐謨鋪文於誥命以光鴻業非明識  
屢經於體遠麗藻已著於知微則何以副我虛求充於任  
使翰林學士中散大夫中書舍人上柱國賜紫金魚袋王  
源中天籟無器大球不磨範圍可以程措紳刀尺可以制  
度量自拔於郎署寘諸中禁嘗因進見敷奏以言揖黃憲  
而褊胸不生覩汲黯而風神自整今時方無事政在和平  
外付股肱內倚心腹必冀協恭以奉上營道而同方俾下  
無間言上無偏聽萬物攸繫朕時賴之勉勤夙夜之規以

副簡求之望可尚書戶部侍郎知制誥依前充翰林學士  
散官勲賜如故

授學士李讓夷職方員外郎充職制

勅夫言語侍從之臣非賢不命久而加獎則彝典也翰林  
學士朝議郎行左補闕賜緋魚袋李讓夷器以琢成材爲  
衆出蘊積邁時之志發明扶道之心學務研精文推軼拔  
早飛聲於戎幕遂躡位於諫垣忠言屢聞密命斯委果揚  
溫雅之稱宜獲持謙一作訐謨之效亦旣久次所宜轉遷受遐  
寵於握蘭用酬勞於視草勉宏前懿以服寵榮可行尚書

職方員外郎依前充翰林學士散官賜如故

授學士王源中等中書舍人制

勅朝廷之制外有綸闈之職以奉大猷中有翰苑之司以  
專密命帝王懿範備舉而行森然在前其道一貫朝散大  
夫守尚書戶部郎中充翰林學士上柱國賜紫金魚袋王  
源中能斷大事美秀而文服君子之儒乘賢人之業朝議  
郎行尚書禮部員外郎充翰林學士上柱國賜紫金魚袋  
宋申錫和順積中英華發外懷致君之志布經國之文二  
者皆國器也先皇帝能用之顧予沖人敢不加敬申命執

事崇其寵章藉右掖之芳名參內庭之重任思爲盡飾朝  
典宜之源中可權知中書舍人依前翰林學士散官勲賜  
如故申錫可守尚書戶部侍郎知制誥充翰林學士散官  
勲賜如故

授學士路隋等中書舍人制

勅夫秩高綸闈職贊書命禁署之內用才尤難蓋以討論  
而功垂無窮潤色而言流有截非嘉績日著雄文風翔則  
何以茂於轉遷副此僉屬朝議郎守諫議大夫充翰林學  
士上輕車都尉賜紫金魚袋路隋澄澄天倪落落風韻氣

含古道行爲人師朝議郎行尚書庫部員外郎充翰林學士上柱國賜紫金魚袋韋表微符彩外朗誠明中虛言皆本仁動必循矩而皆揚厯榮序輝耀朝倫以高行清議發於身以精理敏識稱於職而澄羣疑之聽昭宣素風况選自先朝擢居內職或依經而諫諍爲志或視草而周密居心言念前勞是嘉成績洎予嗣位思親賢人覩形容而鄙悵自祛察言行而公忠益見奧詞達學偉望清規式叶予求宜從朝獎中書理本內禁化源并承訓誥之榮往勵將明之道我方舉爾善爾宜懋厥官隋可守中書舍人依前

翰林學士散官勲賜如故表微可守本官知制誥依前翰林學士散官勲賜如故

授柏耆兵部郎中等制

勅夏官之屬以九法平簡稽司寇之列以三典詰邦禁選用郎吏斯爲重難朝議郎前使持節婺州刺史上柱國騎都尉賜紫金魚袋柏耆勁正誠明富以材識揚聲禮閣直筆諫垣徵事郎使持節蘄州諸軍事守蘄州刺史驍騎尉賜緋魚袋狄兼蓆舊德在人文風擅價興起憲署勞徠疲甿有以恬退自安遇事而後發有以昭融美稱非道而莫

遷顧茲缺員宜乎并拜懋承寵擢以奉彌綸者可守尚書  
兵部郎中散官勲賜如故兼謦可守尚書司門郎中散官  
勲賜如故

授王政雅等兵部郎中制

勅朝議大夫郎守尚書戶部郎中兼侍御史知雜事上輕  
車都尉賜緋魚袋王政雅朝議郎守尚書戶部郎中上柱  
國賜紫金魚袋豆盧曙等御史府紀綱中外事雜而繁故  
常以侍御史一人綜其庶務政無大小罔不關決繇是得  
參舉中臺郎之可者以兼領焉旣而第其諫績以勸能吏



陟明者必載遷於省閣當選者復繼入於憲闡此其可以  
爲重也爾等皆以簡愿端明修詞踐行發強可以守直開  
敏可以適中嘗遊刃於京邑亦坐籌於戎閫臺閣之上聲  
華益高贊均輸於財征表明慎於郵罰分曹左右其用維  
新是宜舉武部之雄以獎成績授都曹之重以勵兼才博  
觀稱服之能式副有司之請政雅可守兵部郎中兼侍御  
史知雜事散官賜如故豆盧曙可職方郎中

授蕭睦祠部員外郎制

勅朝散大夫使持節袁州諸軍事守袁州刺史上柱國蕭

聞異詞乃者輟自夏卿授之戎閫統荆衡之巨鎮嗣羊杜之前聲政推洽平理在徵復禮樂之器予心所難冀流合雅之音將考依經之制慎簡斯久僉諧乃俞俾迴軍旅之謀式暢人祗之職伯夷官業佇乃修明可檢校尚書右僕射兼太常卿散官勲封如故

授楊歸厚太子右庶子制

勅爲官相者非班位已深名望有素則不可也前東都留守判官朝議郎檢校太子右庶子兼侍御史上柱國賜緋魚袋楊歸厚詞場英華諫省勤舊及典列郡政聲必聞乃

者罷符印之勞佐保釐之重賢士君子歎其不遷儲闈屬  
寮中庶爲美爰用分職爾其往哉可守太子右庶子分司  
東都散官勲賜如故

授高重同州刺史兼防禦使制

勅漢號左馮翊分理浩穰近者非清名顯秩不在茲選正  
議大夫行給事中上柱國渤海縣開國男食邑三百戶賜  
紫金魚袋高重沉厚守道貞介操身以禮法爲踐履之途  
以學行爲游泳之地堅金不耗止水無波穆然士風休有  
美論屬者侍周禁署駁議瑣闥重席有戴憑之名通經得

陳邵之美侍從之暇附益宏多移於牧人宜有善政吾以  
商原故地豐水攸同襟帶山川接畛甸服掌離宮之管鑰  
領近關之式遏俾揚風化思得兼材爾宜提舉政經蘇息  
物力清靜率下以奉詔條用荅寵榮勿替休問可使持節  
同州諸軍事同州刺史充本州防禦長春宮等使散官勲  
封賜如故

授裴洌郭臬等諸州刺史制

勅朝散大夫前守蓬州刺史上輕車都尉裴洌朝議郎前  
守通州刺史賜緋魚袋郭臬等夫上之化下猶泥之在鈞

唯甄者之所爲耳以爾等前所爲政皆播能名人多袴襦  
之謠理有綏定之績衡陽苞湖賦繁地闊尤藉良牧以扇  
仁風勉奉詔條陟明斯在洎可守衡州刺史散官勲如故  
臚可守利州刺史散官賜如故

授王承休等諸州刺史制

勅致果校尉守右監門衛將軍兼御史中丞王承休朝議  
郎守太子少尹賜紫金魚袋王宏質等咸以事勞顯於中  
外或武稱和義環衛有嚴或吏能適時長征攸佐循其履  
歷頗謂優深寵以郡符俾洽條理夫以巴賈雜俗山谷異

宜必在通其有無繕其征賦勉茲勤卹用表分憂承休可  
朝請郎使持節陵州諸軍事陵州刺史散官如故宏質可  
使持節澤州諸軍事守澤州刺史散官賜如故

授李渤給事中鄭涵中書舍人等制

勅舉才命官得人斯重詢事考績稱職爲難況較正違失  
典司文誥參我密命爲吾近臣非望實兼優則不在茲選  
朝議郎守諫議大夫知匭使上騎都尉賜緋魚袋李渤清  
標雅裁器韻不羣瞻學積文泉源益濬有濟人經國之術  
資通時利物之才朝散大夫守尚書司封郎中知制誥上

柱國鄭涵操履堅明雄文炳蔚虛懷宏達雅思沖深立言  
嘗見其著誠秉志頗聞其經遠夫澄其源者必清其流端  
其本者必正其末其便蕃禁掖潤色王猷君不可以私其  
人臣不可以虛其受簡材旣因於朕志當官爰俟於爾能  
其有嘉聞以光茂選渤可守給事中散官勲賜如故涵可  
守中書舍人散官勲如故

賈鍊等中書舍人制

勅參掌宥密斧藻訓誥侍立於文陛之下揮翰於禁署之  
中非第一流不在其位朝散大夫守太常少卿知制誥上

柱國賈餗器範溫雅詞藻宏麗朝散大夫守尚書職方郎  
中知制誥上柱國清河縣開國男食邑五百戶崔咸學探  
奧旨文有正聲而皆公論所歸清規擅稱比美玉而光彩  
外溢服華組而煥耀揚輝闕苟大章之才闕識王濬沖之  
質則損乎文佇爾酌中明吾試可無使相如視草專美於  
前時也其懋承之餗可守中書舍人散官勲如故咸可守  
中書舍人散官勲如故

重定房式諡議

式之在西蜀也入人耳目其事熟矣固非愛之者所能粉



飾而文其論惡之者所能披抉而瘠其說蜀之此時雖女子小人亦知兇闢斷頭之不日然爲其用者乃救死於頸語其無勇烈之心斯可矣豈可盡披其附麗之名乎如式之於劉闢旣不能死可謂求生害仁者也而駁議曰大節已虧無乃過言歟何從聞之闢之走西山也召所疑畏者十數輩於庭將盡殺之然後去而式在其間蒼黃之際闢黨有護持者僅免於難推嚮之論則不當如是明矣然居此時有將見危授命之義殺身成仁之道詰之者稱式無愧色愚不信也如是則式之去希烈也理河南也廉宣城

也何以無忠敬之目歟愚論之曰式也不疾任求之目不閉吉邑之口其罪也無王浩棄家之心無譙元受毒之志其罪也如闢之反天子棄墳墓乃曰顧式說一夢以結其心署一牒以張其勢豈其然乎夫人臣不幸罹於是惟死而已矣然孟子曰生吾所欲也矧自軻已下哉使死之易則王諒李業虞悝鴻信不足貴也意者將不可以必死望人乎始以不死罪之以懷生貶之是異論也夫諡者易其名者也夫子曰名以出信又曰名之必可言也名不正則言不順以至于刑罰不中正謂此耳夫豈容易哉語曰於

其所不知蓋闕如也恍惚之夢駁議之外無言者懼非所以昭示後世也臯陶謨曰五刑五用哉言用刑當其罪也刑其支體於一時猶須當其罪矧刑其行義揭之於千萬年歟康誥曰敬明乃罰請依前諡爲傾

杜周士

周士京兆人鄉貢進士

樂德教胄子賦

以育材訓人之本爲韻

國家自誠而明講信修睦旣移風以設教每登賢而制祿由是命司樂之職掌彼成均教舞勺之童取諸鄉族常德

咸事庸言可復納諸軌物則物有其容攝以威儀則儀無  
不淑日就月將不疾而速於以見中和之教克修杞梓之  
材可育觀鼓篋請益攝齊員來嚴師尊道至矣休哉捧函  
丈之筵無思不厭聽撞鐘之間有說必該心不忘於翼翼  
視有主於梅梅審依仁即童蒙之求我語成器如梓人之  
理材且鼓舞鏗鏘徒聞於物格興道諷誦亦資於釋回豈  
如中以理心和而適分敬居簡而可久德有常而不紊孝  
實天經友爲義訓本其至也可以躋天地之情引而伸之  
可以暢雍熙之運則知敦和章德在聖與仁革蒙惑於初

志致輝光於日新於以代天工則庶績時序於以施邦教  
則百姓皆淳斯可謂理以樂成俗師以賢得人於戲至教  
在茲無從匪彛合游洋以來學任道德而爲資孝友祇庸  
則無不順者自上下下可咸使由之夫然則樂之教也義  
微而婉以八音爲制以六德爲本旣履孝而資忠宜任重  
而道遠若然者安得不慎其終而思其反者也

代孔大夫乞朝覲表

臣某言臣以斗筭之資荷旄鉞之寄職兼千乘位總十連  
而節制頒條曾無可紀妨賢專祿亦已四年由是再陳表

章備瀝衷懇誠在必達義無苟安伏惟元和聖文神武法  
天應道皇帝陛下憂勤萬務砥礪庶工服勞中外者有更  
踐之常受寄方隅者無專任之幸所以俗用丕變官稱得  
人坐致平治實使均一天下幸甚天下幸甚今輒冒犯嚴  
譴更陳丹悃不敢廣引遠事請以近日言之至如楊於陵  
鄭絪馬總等或從偏鎮陟授或自周行莅事或三年獲歸  
或三考除替公議惟允私願亦伸伏乞聖慈平分許循往  
例賜停見職擇用羣才則聖代盛審官之規微臣無去國  
之歎無任禱祈之至

代崔中丞請朝覲表

臣某言臣厯刺三州連總三府外任逾紀入覲無階就日  
望雲魂飛心往臣某中謝伏惟睿聖文武皇帝陛下覆載  
無私遐邇同欽復昇平之故事繼前聖之高蹤中外踐更  
出入迭用臣以虛薄叨受恩榮徒竭夙夜之心未伸朝夕  
之敬天威咫尺誠寤寐而無違雲漢昭回固瞻仰而何及  
是以前在朗寧封章累上及移臨松漠星紀屢周微衷尚  
隔於戴盆積望徒懸於窺管葵藿之誠彌切犬馬之戀愈  
深人欲天從於茲未驗下情上達終冀不誣敢黷宸嚴罄

陳丹懇伏乞賜臣除替許至闕庭厠蹈舞於羣寮備班行之散地足趨中禁目覩大明俾成九族之榮以盡百生之幸非敢竊國賓五獻之禮希康侯三接之恩一覲龍顏萬死爲足無任懇到迫切之至謹遣某官陳乞以聞



欽定全唐文卷六百九十四目錄

高元裕

請外臺御史振舉舊章奏

請將賀蘭進興等重付臺司覆勘疏

李夷簡

請定應給食實封絹匹奏

李紳

寒松賦

善歌如貫珠賦

授韓宏河中節度使制

請定四品官制奏

請戶部分判度支奏

對罷役務農論象肉刑判

追昔游集序

壽州法華院石經堂記

四望亭記

蘇州畫龍記

龍宮寺碑

墨詔持經大德神異碑銘

張敦實

積薪賦

費冠卿

九華山化成寺記

王承宗

自陳表

欽定全唐文卷六百九十四

高元裕

元裕字景圭渤海人始名允中大和中改今名第進士元和中累擢尚書左丞出爲宣歙觀察使入授吏部尚書拜山南東道節度使封渤海郡公卒年七十六贈尚書右僕射

請外臺御史振舉舊章奏

伏以天下三司監院官帶御史者從前謂之外臺得以察訪所在風俗按舉不法元和四年御史中丞李夷簡亦曾

奏知監院官多是臺中寮屬伏請委以各訪察本道使司及州縣有違格勅不公等事罕能遵行歲月既久事須振起伏請自今以後三司知監院官帶御史者并屬臺司凡有紀綱公事得以指使

請將賀蘭進興等重付臺司覆勘疏

伏以神策軍所推妖囚訪聞其徒結黨聚眾恣爲兇狡合就嚴刑臣亦料軍中推窮必得情實然獄宜公共刑貴正名今刑部大理皆是陛下掌獄之官都不關知便成其獄三尺之法無所憑依伏乞以元惡三人付大理寺重加覆

問若無異同便正刑書則凡在中外皆知事歸有司不廢  
彝典彰陛下慎刑之意快兆人共棄之心臣忝風憲得議  
刑政事關國體不敢不論

李夷簡

夷簡字易之鄭惠王元懿四世孫以宗室子始補鄭丞棄  
官去擢進士中拔萃科元和時檢校禮部尚書山南東道  
節度使徙帥劍南西川貞元十三年召爲御史大夫進門  
下侍郎同中書門下平章事出爲淮南節度使進太子少  
師分司東都卒年六十七贈太子太保

請定應給食實封絹匹奏

應給食實封官自貞元十三年已後節度使兼宰相每百戶給八百端匹若是絹更給綿六百兩節度使不兼宰相每百戶給四百端匹軍使及金吾諸衛諸軍大將軍每百戶給三百五十端匹至貞元二十一年七月六日勅應食實封其節度使宜令百戶給八百端匹若是絹兼綿六百兩伏以食封本因賞功封之多少視功之厚薄不以官位散要別制等差其節度使兼宰相請准舊例餘節度不兼宰相准貞元二十年已前例處分

李紳

紳字公垂潤州無錫人元和初進士穆宗朝拜戶部侍郎  
開成時爲宣武節度使武宗立徙淮南入爲兵部侍郎同  
平章事轉中書侍郎守右僕射門下侍郎封趙國公出爲  
淮南節度使會昌六年卒贈太尉諡文肅

寒松賦

松之生也於巖之側流俗不顧匠人未識無地勢以銜容  
有天機而作色徒觀其貞枝肅矗直幹芊眠倚層巒則捐  
雲蔽景據幽澗則蓄霧藏烟穹石盤薄而埋根凡經幾載



古藤聯緣而抱節莫記何年於是白露零涼風至林野慘  
慄山原愁悴彼眾盡於元黃斯獨茂於蒼翠然後知落落  
高勁亭亭孤絕其爲質也不易葉而改柯其爲心也甘冒  
霜而停雪叶幽人之雅趣明君子之奇節若乃確乎不拔  
物莫與隆陰陽不能變其性雨露所以資其豐擢影後凋  
一千年而作蓋流形入夢十八載而爲公不學春開之桃  
李秋落之梧桐亂曰負棟梁兮時不知冒霜雪兮空自奇  
諒可用而不用固斯焉而取斯

善歌如貫珠賦

以聲氣圓直有  
如貫珠爲韻

歌者達其志曲者導其情方假象以微妙將類珠而取明  
於以遂條暢於以考清貞揚穆穆之音端而陳德審纍纍  
之節貫以成聲且夫發深誠表和氣惟中規之可法諒徑  
寸而同貴儼然在上初宛轉以凝旒肅若飄空想熒煌而  
動緯惟乙所傳宜商有焉溫良則無類於曲含暢則有取  
於圓雅調相依而瀝瀝清音迭奏而綿綿乍起黃鐘疑蚌  
開而色爛將吟綠水如浦沉而影連美乎迴若循環疎非  
掩抑聲旣發而明朗珠旣貫而絃直九功是闡同在握以  
騰光三歎屢聞非闇投而改色其曲彌清其音彌久馳熠

熠以交映度連連而相受出乎口吻元珠莫覩於可聞入  
彼虛無象罔雖求而何有故能直已中奮和心外舒咄長  
言而皎矣務妙轉以繩如聆湛露之終光懸瑞景體橫汾  
之末目駐神居斯可以正煩濁別流翫陽春續響於孤絕  
白雪連耀於璀璨雖聞唱以殊聲終合音於共貫是知大  
雅含象清明式符曲折而必遵於道周圓而可法於珠俾  
將繼聲者識乎有曲審音者知我無渝

授韓宏河中節度使制

門下王者統馭萬寓緝熙庶政必有文武全器柱石之臣

出壯藩岳入和台鼎使其效彰中外聲播華夷所居而人  
心自寧所莅而軍令自肅克是任者其惟至公開府儀同  
三司守司徒兼中書令上柱國許國公食邑三千戶韓宏  
受天地凝粹之氣得山川崇深之靈厚其體而莊其容虛  
其心而宏其量早洞戎韜之畧久膺節制之權隱然大梁  
克有成績及功宣盪寇志展勤王懇申戀闕之誠竟遂來  
朝之禮位高百辟榮冠一時恩極而愈恭名光而益勵朕  
方欲樹以垣翰仗乎忠賢乃睠關河之首實惟股肱之郡  
自昔重寄無非元勲是用命以上公復茲雄鎮於戲頃居

東夏父子偕分閭之榮今處近郊伯仲並登壇之貴道苟積於忠實顧何愛於寵章往惟欽哉副我明命可守司徒兼中書令河中尹充河中晉絳慈隰等州節度觀察處置等使散官勲封如故主者施行

請定四品官制奏

據六典隋置諫議大夫七人從四品上大厯二年昇門下侍郎爲正三品兩省遂闕四品建官之道有所未周詩云衮職有闕仲山甫補之周漢大臣願入禁闥補過拾遺張衡爲侍郎爲居帷幄從容諷諫此皆大臣之任故其秩峻

其任重則敬其言而行其道況謇諤之地宜老成之人秩  
未優崇則難用耆德其諫議大夫望依隋氏舊制昇爲從  
四品分爲左右以備兩省四品之闕向後與丞郎出入迭  
用以重其選又御史中丞爲大夫之貳緣大夫秩崇官不  
常置中丞爲憲臺之長今寺監少卿少監司業少尹並爲  
寺署之貳皆爲四品中丞官名至重見秩未崇望昇爲從  
四品

請戶部分判度支奏

南宮六曹皆有職分各責官業即事不因循近者戶部度

支多是諸軍奏請本司郎吏束手閒居今後請祇令本行分判委中書門下簡擇公幹才器相當者轉授

對罷役務農論象肉刑判

得戶部議請罷秦中百役專務農計其人可止  
關東轉漕長吏云兵滿近郊農人未復恐不足  
支國用又甲與乙俱獻書甲請復象刑云行之  
已久人必自化乙請復肉刑云三代舊法所活  
甚多大理議俱不中

四征不庭錢穀是貴百王所切刑法其難將哀輓粟之勞

同舉赭衣之論顧茲建議惟彼獻書職勞不來既有東人之歎惟命難繼永瞻緹紫之感豈擢髮之未允何次骨之攸聞澶漫渭川曾莫顧其千畝刻深秦法且不愧於多端應緣兵未解鞍衣迷襪襖人猶拔劍法異墨幪計必平均不應瘠魯肥杞令資禁止何必噬膚削足況國家儉嗇寡欲好生惡死永懷其禍每捐無益之功尚媿論兵豈命有司之殺職由是舉合量出入德用不擾當測淺深減功恤勞旣令戎祀能紀揆今酌古必使憲章不墜三輔長吏不牽復於所司千代宏綱兼行之於聖日



追昔游集序

追昔游蓋歎逝感時發於悽恨而作也或長句或五言或雜言或歌或樂府齊梁不一其詞乃由牽思所屬耳起梁谿歸諫署升翰苑承恩遇歌帝京風物遭讒邪播歷荆楚涉湘沅踰嶺嶠荒陬止高安移九江泛五湖過鍾陵沂荆江守滁陽轉壽春改賓客留洛陽廉會稽過梅里遭讒者再賓客爲分務歸東周擢川守鎮大梁詞有所懷興生於怨故或隱顯不常其言冀知者於異時而已開成戊午歲

秋八月

壽州法華院石經堂記

如來以萬門萬行普示羣生隨其性根用假方便水月觀  
象萬泉俱鑑識真如者知非在水慧燈傳照百千同朗識  
佛智者知燈在覺是以如來開三乘諭演菩提旨傳十二  
輪度生死海是經之要妙諸佛之心印卷舒萬法彰示凡  
聖信解得入入爲真諦無我無我無爲無爲無生無生無  
滅無滅諸佛如來不以寂滅自樂無生自處故現生滅以  
示羣迷入煩惱中解眾生縛入有相中示眾生滅是以諸  
佛如來以一切眾生煩惱苦海無明罪垢爲解脫方便故

經有火宅窮子以宏法諭有衆生有煩惱離煩惱即諸佛  
有煩惱即衆生煩惱蓋纏不知明覺如寐如病佛爲解寐  
療病衆生昏業不能解釋故如來廣清淨教開是經典用  
曉迷愚以示方便聞是經者發菩提心持是經者入如來  
智一禮一敬皆資勝因刻於貞石瞻仰常覩表佛慈旨無  
言現言刊諸蓮宮永乘福慧太和六年歲在壬子七月旣  
望缺之二日書

四望亭記

濠城之西北隅夾聳四達縱目周視迴環者可數百里而

遠盡彼目力四封不閱嘗爲廢墉無所竚望郡守彭城劉  
君字嗣之理郡之二載步履所及悅而創亭焉豐約廣袤  
稱其所便棟幹梯陞依墉以成崇不危麗不侈可以列賓  
筵可以施管磬雲山左右長淮縈帶下繞清濠旁闕城邑  
四封五通皆可洞然太和七年春二月紳分命東洛路出  
於濠始登斯亭周目四矚美乎哉春臺視和氣夏日居高  
明秋以閱農功冬以觀肅成蓋君子布和求瘼之誠志豈  
徒縱目於白雪望雲於黃鶴庾樓夕月峴首春風蓋一時  
之勝爽無四者之眺臨斯亭之佳景固難儔儷哉淮柳初

變濠泉始清山凝遠嵐霞散餘綺顧余嘗爲玉堂詞臣筆  
硯猶在請書亭表事刻石記言癸丑歲建卯月七日趙郡  
李紳書

蘇州畫龍記

自造父劉累歿豢氏不副龍不復擾隱去莫狎往時見史  
必書志代以目識者寡之故工得以詭亂形狀神其變化  
彪炳五色逾遠真像蓋上飛於天晦隔層雲下歸於泉深  
入無底考之丹青難以徵驗好事者張其畫以示羣目觀  
者或駭疑得其狀長洲令廳北廡有畫蛟龍六焉元素異

鱗狀殊質怪驤首拖尾似隨風雷乘櫨薄楣若軼雲雨燕  
雀懼棲其上螻蟻罔緣其側目視光射瑩無流塵伸盤透  
迤如護榱棟每飛兩度牖疎雲殷空鱗鮮耀陰顧壁疑拔  
志其側曰僧繇弗興之舊度模之不知何人也二工圖龍  
天與幽思今是壁指遠異代繼之圖法無謝於二子而名  
漏不傳詢於耆人亦絕傳記茂宰博陵崔君據始命余述  
舉丹素實驗附邑書末簡庶乎後數百年棟宇斯變龍亡  
其像而事刻編簡繇昭昭然時貞元癸未歲秋七月記

龍宮寺碑

會稽地濱滄海西控長江自大禹疏鑿了溪人方宅土而南巖海跡高下猶存則司其水旱洪爲雲雨乃神龍之鄉爲福之所寺曰龍宮在剡之界靈芝鄉嵒亭里地形爽塏林嶺依抱剎宇頽毀積有年所自創置基三徙而安此地像儀消化鐘磬不揚堵波已傾法輪莫轉老釋修真持誠茲寺護念常啟願興伽藍而歲月屢遷物力無及貞元十八年余以進士客於江浙時適天台與修真會於剡之陽師言老禪有念今茲果矣後當領鎮此道幸願建龍宮以資福履余以爲孟浪之詞笑而不荅師曰星歲有期愚有

冥告泉元和三年余罷金陵從事河東薛公平招遊鏡中  
師已卧病而約言無易太和癸丑歲余自分命洛陽承詔  
以檢校左騎省廉察於茲歲逾再紀而修真已爲異物龍  
宮棟宇將盡命告墳塔因追昔言遂以頭陀僧會眞部領  
工人將以歲事余以俸錢三百貫闕二字監軍使毛公承泰  
亦施焉以月俸俾從事僚吏咸同勝因閭里慕仁風靡爭  
施子來之功力雲集清涼之蓮宇鬱興浹旬而垣墉四周  
逾月而棟幹連合煥矣眞界昭乎化城擇靜行僧居之以  
總寺事因具香饌告誡法王上以資我后無疆之祚次以



資神龍水府之福以名寺之功力爲祐靈之顯報一雨之  
施潤洽必同佛言龍王心力所致七郡山澤城邑萬人介  
福所安翳我龍德是用迴此法力永資泉宮僧齋護念常  
爲仰荅余固不敢以修真之言自伐俾竭誠以爲人刻石  
記言於寺之刹銘曰

滄海之隅會稽巨澤惟禹功力生人始藉土壤山嶼濱海  
之東溟漲空闊邈秘龍宮貝闕難知珠宮莫測雲雨交昏  
深沉不隔聞法必聽依佛必降豈騰溟海亦化長江旣資  
勝因爲龍景福節宣風雨以成播育撞鐘以告三界必聞

惟爾龍室昭昭不昏我昔麻衣有僧傳言斯人已亡斯言  
不泯敬報前志以垂後功建飾儀相昭明有融普利羣生  
罔資已力琢磨記言垂示無斁

墨詔持經大德神異碑銘

賢劫千佛生於後世法輪遞轉應現隨相或國王大臣宰  
官居士降生有地不以色相故如來言以色見我以音聲  
求我爲行邪道不以金色瑞相蓮花化生降胎示報以潛  
靈聖上人姓唐氏生於邑之安吉母梅氏奇孕而夢協靈  
祥在娠而不茹葷血旣生能言不爲戲弄未齠之歲思求

佛乘發念法華三月通貫傳梵音於性稟精護念於神契  
經聲一發而頑鄙革心晝集夜持而七部圓滿音聲從容  
指顧閑雅雖捷口利辯者皆隨慕念及登戒之歲僧儀首  
冠西游長安祥風達於函關瑞相通於帝夢上人以持經  
爲國詣闕請見肅宗皇帝召對禁中上拱而歎曰昔夢吳  
僧口念大乘五光隨發音容宛若協我嘉徵因賜名曰大  
光以瑞唐姓肅宗元年降誕之辰會齋於定國寺因賜上  
人墨詔許以天下名寺持意往者住持令內臣趙思溫送  
於千佛寺持經道場經四七日而吳音清亮常達聖聽上

異其事令高力士以宣諭焉後居藍田精舍先期而寺僧夢天童來降稱曰大光經聲達於峯頂師旣晏坐自見神手從天而降拊光之心師乃憶先達抱玉大師常志師言令高法音當有神輔夕夢神僧乳見於心命光口飲自是功力顯揚神形不勞尋山探幽偶墜窮谷龍泉莫測淪溺其間心靈了然無所惑亂因以本經多寶塔爲誠願持十萬遍恍然出泉若有神捧後詔住資聖寺大師以慈親在吳未答慈力表乞歸養恩未許還猶繫煩惱之念遂生無妄之疾策蹇強力將投於泉驢伏不前羣鳥拂頂心旣時

覺疾乃遂瘳昔如來雙鵲巢頂而定慧堅明大師羣鳥摩  
首而煩疑解脫乃以寶軸加飾首戴法華於千福寺行道  
日夜候命有詔許還遂止烏程崇修寶塔日持法華偈以  
成往願焉永泰元年浙西廉察使韋元輔表大師爲六郡  
別駕道場將念之首大厯癸丑歲文忠公顏真卿領郡余  
先人主邑烏程余生未期歲乳病暴作不嘔不覽者七辰  
師至命乳母洗滌焚香乃朗念法華至功德品遂起席而  
坐拱而開目師飲以杯水遂命乳哺疾乃隨愈大師視而  
笑曰汝何願返之速乎因以法師易余幼名貞元中余甫

弱冠再遊雲上舟泊之次大師竚於溪側而笑戲拊如兒  
童焉余爲州將飲醉於館大師引宿於道場夜分將醒白  
光滿室朗然如晝覩大師晏坐妙音方闡若開毫相經音  
旣息光亦隨斂余是年西邁辭大師於法筵撫余頂曰爾  
得徑山之言我則無以爲諭行矣自愛去留有時空王教  
平等者護念大師於永貞元年十二月黑月旣夕示滅於  
法華寺之經院獸號鳥墜山木驚振異香飄馥三日不息  
是日告刺史顏防善曰去矣人世無牽夢泡大師熙和暢  
達無入不得隨機見教經行無閼維摩詰之儔也知機洞

如藏往察來默而不顯晉寶公之倫也經通梵界瑞降天  
童靈相神光照融顯見曇上人之徒也大哉明德慈悲護  
世通異相於王宮示法輪之寶重昏外識於黎庶懼色相  
之迷妄是以居若長橋動如浮雲隨鷗自親入獸不亂一  
衲四十歲無浣濯而居常香馥一飯七十載資禪悅而膚  
體溫然余遭大師留駐於世而不覩大師寂滅之日年逾  
耳順昏寄塵勞無法舸以濟河悲火宅之迷室忝門徒者  
追書梵宮時予烏臺舊僚天官郎敬君守郡吳興寄言刊  
石銘曰

多寶如來聞經誦塔牟尼闍教以宏正法受持三世以成  
賢劫或降忉利或生人天金相不顯真如默傳明燈繼燄  
水月分圓示抱全德資於上賢體實戒珠心惟法鏡懷寶  
不迷含光不競希夷要妙法凝清淨發諭開蒙藏機匿聖  
瑞協皇夢功致天童聲宣梵界響達宸聰降靈神手捧溺  
龍宮跡隱三昧心符六通金粟分身普賢馳象譬喻言辭  
光明顯相仁滋一雨功歸無量法性天高慈門海曠我昔  
嬰兒迷蒙疾痼靡日沉魄返年師駐梵音耳聽神光目覩  
白馬先鑣迷津莫遡鼓音已息慈雲不浮寶樹摧華祥泉



涸流稠林喪斧苦海沉舟色相歸空法身無際莫測往來  
誰分顯晦三表闡仁深乎晏諦

張敦實

敦實憲宗朝爲沂沭觀察副使時觀察使王遂以慘刻臨  
下裨校王弁因眾怒爲亂敦實及於難

積薪賦

以後來者  
居上爲韻

積薪如之何伐自中野藏用如之何俟夫囊者當就燥而  
未及固不材而見捨我盈彼竭在浸浸以增高顛之倒之  
信多多而益寡來因高岡之上徙殊曲突之下知附熱之

足貪兼微光而是假原乎瞻彼林薄爰發條枚綢繆旣束  
負荷皆來始交積以發地俄重疊而如堆顧遇何期亦有  
含音之器操持儻用豈無束濕之才匪伐柯於林下疑設  
燎於庭隈入用雖慚於散木待燃未怯於死灰幸薰灼之  
可近惟掄擇之所裁必能揚大君之光資烹飪以調味豈  
徒發太守之化祈澍雨以禳災觀其疊迹連牆攢形內向  
功成執熱化歸炎上催發生於庖人廢全模於梓匠曾不  
知從橫長短之術成結構高卑之狀犬牙交列未失本枝  
之形蠅翼巧成猶蓄運斤之望豈徒分強幹弱枝之義留

錯節盤根之餘異掄材而晉用似槽巢而夏居幸燭火未  
熄與獸炭焚如無之實難鑽燧者於茲待乏雖欲勿用和  
羹者焉能捨諸古人懲用賢之乖喻積薪爲偶奚自我而  
爭先反忽焉而在後念採掇之所在顧高下而何有倘堅  
貞之可求庶有心而不朽

費冠卿

冠卿字子軍青陽人元和二年進士母喪廬墓隱居九華  
少微峯長慶三年御史李仁修舉孝節召拜右拾遺辭不  
受

九華山化成寺記

九華山古號九子山崛起大江之東揖瀟廬於西岸儼削成於天外旁臨千餘里高峯峻嶺臣焉連岡走隴子焉自元氣凝結幾萬斯年六朝建都此爲關輔人視山而天長山閱人而波逝其間聖后賢臣歌詠疊興言不及者茲山屈焉開元末有僧檀號張姓自羣舒至爲鄉老胡彥請住廣度男女時豪所嫉長吏不明焚其居而廢之時有僧地藏則新羅王子金氏近屬項聳奇骨軀長七尺而力倍百夫嘗曰六籍寰中三清術內惟第一義與方寸合落髮涉

海捨舟而徒睹茲山於雲端自千里而徑進披榛援藟跨  
峰越壑得谷中之地面陽而寬平其土黑壤其泉滑甘巖  
棲澗汲以示高潔曾遇毒螫端坐無念有美婦人作禮奉  
藥云小兒無知願出泉補過應視坐石石間漶漶時人謂  
九子神焉素願寫四部經遂下山至南陵有俞蕩等寫獻  
焉自此歸山跡絕人里逮至德初有諸葛節等自麓登峰  
山深無人雲日雖鮮明居惟一僧閉目石室其旁折足鼎  
中惟白土少米烹而食之羣老投地號泣和尚苦行若此  
某等深過已出泉布買檀公舊地敢冒死請大師從之近

山之人聞者四集伐木築室煥乎禪居有上首僧勝諭等  
同建臺殿梗桷豫章土地生焉斷而斲之珷玞琪瓊不求  
他山肆其磨礱開鑿溪澗盡成稻田相水攸瀦爲放生池  
乃當殿設釋迦文像左右備飾次立朱臺掛蒲牢於其中  
立樓門以冠其寺丹素交彩層層倚空崑巒隊起於前面  
松檜陣橫於後嶺日月晦明以增其色雲霞聚散而變其  
狀松聲猿嘯相與斷續都非人間也建中初張公嚴典是  
邦仰師高風施捨甚厚因移舊額奏置寺焉本州牧賢者  
到寺嚴師之敬江西估客於雲外見山施帛若干匹錢若

于緡焚香作禮遙以祈祐師廣德焉况親承善誘感悟深哉旁邑豪右一瞻一禮必獻桑土豈諸牧不合禮焉富商大族輕其產哉道德感也本國聞之相與渡海其徒實眾師憂無糧發石得土其色青白不塤如麵夏則食兼土冬則衣半火無少長畬田採薪自給中歲領一從者居於南臺自緝麻衣其重兼鈎堂中榻上惟此而已池邊建臺厝四部經終日焚香獨味深旨時年九十九貞元十年夏忽召眾告別罔知攸適但聞山鳴石隕感動無情與將滅有尼侍者來未及語寺中扣鐘無聲墮地尼來入室堂椽三

壞吾師其神歟跌坐函中經三周星開將入塔顏狀亦如  
活時昇動骨節若撼金鎖經云菩薩鈎鎖百骸鳴矣基塔  
之地發光如火其圓光與佛廟羣材締構衆力保護施一  
金錢報一重果下爲輪王上登聖地昔有護法良吏洎施  
一僧檀越等具刻銘於石士疾歿代不能立殊績以濟衆  
又不能破餘財崇勝因緣啄腥羶顧兒婦生爲人非死爲  
鬼責悲哉時元和癸巳歲余閑居山下幼所聞見謹而錄  
之孟秋十五日記

王承宗



承宗成德軍節度使贈司徒士真子也士真卒嗣領節度  
吳元濟反承宗上書請宥又遣盜殺宰相武元衡數出兵  
掠鄰鄙詔削官爵吳元濟誅承宗懼求入侍恩許自新復  
官爵元和十五年死贈侍中

自陳表

臣頃在苦廬綿歷時序恭守朝旨罔敢闕違復奉詔書令  
獻州郡迫以三軍之勢不從孤臣之心今天兵四臨王命  
久絕白刃之下難避國刑殷憂之中轉積釁隙中由盧從  
史首爲亂階興天下之兵生海內之亂旣不忠於國又不

孝於家當其聞父之喪已變爲臣之節迫脅天使瀆素朝  
經而乃幸臣居喪敗臣求利上敢欺於聖主下不顧其死  
親矯情徒見於封章邪妄素萌於胃臆今構禍者已就擒  
獲抱冤者實冀辯明況臣之一軍素守忠義橫被從史離  
間君臣哀號轅門痛隔中外伏冀陛下以天地之德容納  
爲心宏好生之仁許自新之路順陽和而布澤因雷雨以  
覃恩追念祖父之前勞俯觀臣子之來效特開湯網使樂  
堯年